

առնուկին ուրանալ ի քրիստոնեութենէն, չարամահ սպանանէին զամենեսեան յամենայն ի բերդսն՝ յորս տուեալ էր զնոսա անդ:

7 Իսկ Վահանայ էր քոյրաթիւ ի Մամիկոնեան տոհմէն, քոյր Վարդանայ՝ Յամազասպուհի¹. Եւ էր նա կին Գարեգնի տեառնն Ռշտունեաց զաւառին: 8 Չսա եթող եւ փախեալ Գարեգին այր իւր ի ժամանակին, յորում եկն Շապուհ արքայ Պարսից յերկիրն Յայոց. իսկ զտիկինն Ռշտունեաց ի միջնաբերդն Վան բերդի, որ էր քաղաքն ի Տոսք զաւառին: 9 Իսկ անաւրէնն Վահան եւ Մերուժանն հրաման տային բերդակալին, զի նեղեսցէ զկինն. եթէ ոչ առցէ յանձն զաւրէնս Մազդեզանցն, տայր հրաման կախել զբարձր աշտարակէն եւ սպանանել: 10 Իբրեւ ոչ առնոյր յանձն Յամազասպուհի պահել զաւրէնս Մազդեզանցն, հանէին ի բարձր աշտարակն՝ որ կայր ի վերայ բարձր գահուն քարին, որ հային ի կողմն ծովակին ի գետոյ կուսէ. եւ մերկացուցին զնա իբրեւ ի մաւրէ. եւ արկեալ կապ զտոիցն, գլխիվայր կախեցին զնա զբարձուէն կուսէ. եւ այնպէս մեռաւ ի կախաղանին: 11 Եւ էր նա սպիտակ մարմնով, եւ պայծառ տեսանելովն. կայր կախեալ յերեւոյթ տեսիլ նշանակի, եւ փաղփաղէր մարմինն ի բարձուէն զոր աւրինակ ձիւն սպիտակութեամբն. եւ բազում մարդիկ ժողովէին տեսանել աւր ըստ աւրէ, զի իբրեւ սքանչելի ինչ երեւեր յաշխարհին: 12 Յայս տեսիլ տիկնոջն Յամազասպուհեայ՝ Էառ կին մի դայեակն Նորին, ագաւ նա պարեզաւտ մի՝ զոր անակիւղս² կոչեն, եւ Էաժ գաւտի ընդ մէջ իւր. եւ կայր առ բարձր գահուն քարին ի ներքոյ աշտարակին՝ զորմէ կախեալ էր զսանն իւր, մինչեւ կողոպտեցաւ ամենայն մարմինք դիոցն: 13 Եւ որչափ ի վայր վայրէին³ ոսկերքն, նա յիւր ծոցն ժողովէր բովանդակ զամենայն զոսկերս սանին. եւ առեալ զնաց յիւրսն:

14 Եւ այնչափ չար էին արքն երկոքին, զի անգամ իւրեանց ումեք ոչ ուղորմէին. այլ անխնայութեամբ դատէին զաւտարս եւ զիւրեանց ընդանիս: 15 Ատրուշանս շինէին ի բազում տեղիս, եւ զմարդիկ հնազանդէին աւրինացն Մազդեզանց. եւ բազում յիւրեանց սեփհականսն շինէին ատրուշանս, եւ զորդիս եւ զազգայինս իւրեանց տային յուսումն Մազդեզանցն: 16 Ապա որդի մի Վահանայ, անուն Սամուէլ, Եհար սատակեաց զՎահան զհայր իւր, եւ զՌմիգդուխտ զմայր իւր՝ զքոյր Շապիոյ Պարսից թագաւորին. եւ ինքն փախստական լինէր յերկիրն Խաղտեաց:

1 *Յամենայն օրինակս*՝ եւ Յամազասպուհի

2 *Յերիս օրինակս*՝ անկիւղս

3 *Ի միում օրինակի*՝ ի վայր վարէին